

TEZAU LITURGIC

16 IUNIE

ACATISTUL SF. CUVIOS TIHON DE LA KALUJA



MOSCOVA, 2000



Акафист

святому преподобному Тихону, Калужскому чудотворцу

Кондак 1

Возбранный чудотворче и предивный постниче, великий угодниче Христов, преподобне отче Тихоне, граду и стране нашей источаяй многочисудесныя цельбы и милости, восхваляем тя любовью, достохвальне; ты же, яко имея дерзновение ко Господу, от всяких нас бед свободи, да зовем ти: Радуйся, преподобне отче наш Тихоне чудотворче.

Икос 1

Ангелов Творец, в Троице Бог славимый, предуведевый чистаго сердца твоего изволение, показа тя миру истиннаго ревнителя благочестия и добродетелей подвижника, вся земная вменившего в уметы. Того ради мы, любовь побеждаеми, вопием ти сице:

Радуйся, богоносне, небесный человек;

Радуйся, земный ангеле.

Радуйся, обителище Пресвятаго Духа;

Радуйся, яко Бога ради отечества страну оставил еси.

Радуйся, яко в пустыню вселился еси;

Радуйся, яко слезами оную напоил еси.

Радуйся, яко теми оную многоплодну сотворил еси;

Радуйся, яко Божественными песнопениями сию просветил еси.

Радуйся, яко в той ученик стадо собрал еси;

Радуйся, яко страху Божию тех научил еси.

Радуйся, яко и ныне непрестанно молишися ко Господу о совершающих благочестно память твою;

Радуйся, яко и нас соблюдаеши от врагов видимых и невидимых.

Радуйся, преподобне отче наш Тихоне чудотворче.

Кондак 2

Видяще, яко дана тебе бысть от Господа, преподобне отче наш Тихоне, благодать подавати скорое вспоможение всем, с верою к

святым твоим мощем приходящим, и содевати преславная чудеса, мы, веселящися, яко имеем такового милостиваго помощника, прославляем всесильнаго Бога и вопием Ему: Аллилуиа.

Икос 2

Разум богомудрый стяжав и усмотрев суету мира сего, преподобне отче Тихоне, помышляя о небесном, вселился еси в пустыню, и в ней преславный храм боголепнаго преображения Господня и обитель устроив, собрал еси ту множество ученик. Сего ради вернии научишася воспевати тебе сие:

Радуйся, яко стаду твоему отец и наставник был еси;

Радуйся, яко смиренномудрием тех исправлял еси.

Радуйся, яко обычай кроток имел еси;

Радуйся, яко незлобиво сердце стяжал еси.

Радуйся, яко земная отринув, умом твоим к небесным возшел еси;

Радуйся, яко к вышнему течение твое выну исправлял еси.

Радуйся, яко в добродетелех преславен обрелся еси;

Радуйся, яко кроткому пастырю Христу последовал еси.

Радуйся, яко алчущих питал еси;

Радуйся, яко жаждущия напоил еси.

Радуйся, яко всегда едино пред очима имел, еже со Христом быти;

Радуйся, яко Той тя пресели в вечныя обители блаженства.

Радуйся, преподобне отче наш Тихоне чудотворче.

Кондак 3

Силою, данною ти свыше, блаженне Тихоне, долготу летнюю, пустынное озлобление и в потребных скудость пред очима имея, терпел еси благодарно, и тем Христа обрет в души твоей, Тому выну воспевал еси: Аллилуиа.

Икос 3

Имуще ты воистинну, отче Тихоне, подвижника крепкаго и молитвенника бодраго, и мысленно взирающе на досточудныя твоя

подвиги и труды, мы, любовью твоею побеждаемы, умильно вопием ти сице:

Радуйся, яко ангельски на земли пожил еси;

Радуйся, яко жития чистотою страну нашу просветил еси.

Радуйся, яко тяготу вара дневнаго понесл еси;

Радуйся, яко слезными потоки землю сердца твоего напоил еси.

Радуйся, яко теми лукавых духов ополчения попрал еси;

Радуйся, яко молчанием язык обуздал еси.

Радуйся, яко благою жизнью твоею образ терпения и смиренномудрия нам явил еси;

Радуйся, яко высоту добродетелей достигл еси.

Радуйся, яко восприял еси Святаго Духа озарение;

Радуйся, яко воистинну честна смерть твоя, преподобне.

Радуйся, яко и по смерти с нами пребываеши;

Радуйся, яко верно почитающим тя во всяких
нуждах помогаеши.

Радуйся, преподобне отче наш Тихоне
чудотворче.

Кондак 4

Буря недоумения смущает ум наш, како бо
возможем исчислити подвиги твоя, блаженне
Тихоне: бдение и сухоядение, непрестанныя
молитвы и прочия добродетели; но мы дивно
Богу, в тебе прославляющемуся, дерзаем
воспевати: Аллилуиа.

Икос 4

Слышавше ближнии и дальнии, преподобне
отче наш Тихоне, ангелоподобное твое житие, и
яко молитвою твоею мнози, с верою
притекающи к раце мощей твоих, исцеление
приемлют от разнообразных недугов, благодарно
вспоминающе о толиких твоих благодеяниях,
радостно взывают к тебе таковая:

Радуйся, недугующих врачу;

Радуйся, скорбным сострадателью.

Радуйся, в душевных и телесных немощех
скорый целителю;

Радуйся, елей милости подающий.

Радуйся, светильник, благочестием сияющий;

Радуйся, яко древо благорасленное при водах.

Радуйся, яко многи ветви добродетелей
израстил еси;

Радуйся, яко под сень пустыни твоя хотящих
спасения принимал еси.

Радуйся, яко о тех молитвенник тепл в жизни
твоей был еси;

Радуйся, яко благими делы душу твою
украсил еси.

Радуйся, яко велику благодать и силу от Бога
приял еси;

Радуйся, просящим милости подателю.

Радуйся, преподобне отче наш Тихоне
чудотворче.

Кондак 5

Боготечная звезда явился еси во стране
нашей, наставляя всех на путь спасения;
призывающих бо ты вскоре предваряеши и от
всяких бед и напастей избавляеши, верныя же
научаеши спасающему тобою Богу взывати:
Аллилуиа.

Икос 5

Видевши российстии народи богоспасаемя страны сея пречудное по Бозе житие твое, Тихоне преподобне, яко аще и последи лет нам возсиял еси, но древних отец чести сподобился еси, дарования чудес достойно приим от Бога, того ради научишася пети тебе:

Радуйся, великий Богу угодниче;

Радуйся, яко во временней жизни, любви ради ко Господу, выну во спасение души твоея трудился еси.

Радуйся, яко Его же помощию оставль тленная стяжал еси блага неистленная;

Радуйся, яко благодатию Божиею сподобился еси стояти у Престола Владычня.

Радуйся, яко тако сподобился еси быти причастником славы вечныя;

Радуйся, тамо получивый благодать ходатайствовати о нас.

Радуйся, скорый помощниче призывающим тя;

Радуйся, готовый пособителю христианом.

Радуйся, православному нашему царству защитителю;

Радуйся, многая чудеса благодатию Святого Духа содеявый.

Радуйся, тем слепым прозрение подавая;

Радуйся, хромым хождение исправляя.

Радуйся, преподобне отче наш Тихоне чудотворче.

Кондак 6

Проповедует Калужская наша страна труды твоя и подвиги, богомудре Тихоне, подъятые тобою душевнаго ради твоего спасения, егоже ради прослави тя Господь славою благолепною. Темже в пустыни яко древо благоплодовитое явился еси, от негоже духовно питаемся, благодаряще Бога и вопиюще к Нему: Аллилуиа.

Икос 6

Возсия православней россиястей земли нашей просвещение совершенных твоих добродетелей и чудес, преподобне отче Тихоне, о нихже благодаряще Бога, давшаго тебе таковую благодать, к тебе, яко к теплomu о нас молитвеннику, радостная воспеваем, глаголюще:

Радуйся, живой ангельски на земли;
Радуйся, от страстей греховных себе
удаливши.

Радуйся, образ истинного терпения бывый;
Радуйся, совершенное смирение нам в себе
явивый.

Радуйся, наставниче спасению;

Радуйся, грешных приводяй ко исправлению.

Радуйся, Христовых заповедей исполнителю;

Радуйся, душ немощных целителю.

Радуйся, лукавых духов прогонителю;

Радуйся, благочестия ревнителю.

Радуйся, неоскудный милости подателю;

Радуйся, благих желаний исполнителю.

Радуйся, преподобне отче наш Тихоне
чудотворче.

Кондак 7

Хотя избран дом Духу Святому себе
сотворити, потщался еси тесным и прискорбным
путем, ведущим в жизнь вечную, ити, еже
благодатию Божию от юности твоя совершив
непорочно, тем достигл еси в небесном

всерадостном пребывании воздаяния, и тамо благодарственно поеши Богу: Аллилуиа.

Икос 7

Новую благодать показа всех Владыка тебе, богомудре Тихоне: многая бо и преславная чудеса в мире живущим людям действуеши и скорым твоим ходатайством пособствуеши. Темже вопием тебе таковая:

Радуйся, иноком добрый наставниче;

Радуйся, пустыню имевый яко тихое пристанище.

Радуйся, яко в той аки безплотен пожил еси;

Радуйся, аки многомятежие мира презрел еси.

Радуйся, непостоянную суету яко прах вменивый;

Радуйся, яко к премирным ум твой возвел еси.

Радуйся, яко безмолвием воздержал еси телесныя чувства;

Радуйся, яко тем Богу угодил еси.

Радуйся, ангельскую жизнь стяжавый;

Радуйся, яко ко отшествию от мира сего всегда себе готовил еси.

Радуйся, яко благими делы душу твою украшал еси;

Радуйся, о людех неложный молитвенниче.

Радуйся, преподобне отче наш Тихоне чудотворче.

Кондак 8

Странное чудо и выше ума: ты бо преславную от Бога прием благодать, с верою прибегающим к тебе источаеши дарования исцелений, преподобне отче Тихоне; сего ради славит тя священная твоя обитель, идеже положено святое твое тело, и мы, усердное моление zde приносяще, благодарим прославльшаго тя Господа и выну вопием Ему: Аллилуиа.

Икос 8

Весь еси и всем воистинну, преподобне отче Тихоне, дивен явился еси: аще бо и плоть в мире носил еси, но вся плотская мудрования презрев, ангельски на земли пожил еси. Мы же, видевшя толикыя твоя подвиги, благодарными устнами вопием ти:

Радуйся, собеседниче ангелов;

Радуйся, украшение праведных.

Радуйся, ластовице сладкопеснивая;

Радуйся, органе Духа Святаго. Радуйся,
цевнице духовная;

Радуйся, отче чадолюбивый.

Радуйся, стада твоего пастырю добрый;

Радуйся, благий и верный рабе.

Радуйся, делателю винограда Христова;

Радуйся, данный тебе талант от Бога
усугубивый.

Радуйся, неподвижимый благочестия столпе;

Радуйся, непоколебимое ограждение веры.

Радуйся, преподобне отче наш Тихоне
чудотворче.

Кондак 9

Всякия болезни наша и печали утоли,
великий наш заступниче, преподобне отче
Тихоне, и подаждь нам последовати твоему
житию, славу земную ни во чтоже вменяти и
честь временную презирати; тоя бо ради
добродетели прослави тя Бог на небеси, идеже

ныне Ему ты предстоиши и непрестанно
воспеваеши: Аллилуиа.

Икос 9

Вития многовещанныя недоумеют достойно
славить тя, преподобне отче Тихоне, ибо многая
и преславная чудодействия источаеши
благодатию Божию. Мы же, любовью
побеждаеми, дерзаем пети тебе сице:

Радуйся, слепых просветителю;

Радуйся, хромых исправителю.

Радуйся, расслабленных целителю;

Радуйся, злых помыслов прогонителю.

Радуйся, скорбящих утешение;

Радуйся, яко хульные уста вражия заградил
еси.

Радуйся, яко ослабленная сердца к вере и
упованию наставил еси;

Радуйся, яко твоими молитвами тех спасл
еси.

Радуйся, яко тьму суеверия прогнал еси;

Радуйся, яко к небесному свету многих
направил еси.

Радуйся, светильниче, сияющий
добродетельми;

Радуйся, единого Бога истинный
исповедниче.

Радуйся, преподобне отче наш Тихоне
чудотворче.

Кондак 10

Спасти хотя душу твою, преподобне отче
Тихоне, в юности возраста своего оставя
отечество твое и страну, достигл еси
царствующаго града Москвы, и конечнаго ради
смирения своего восприяв иноческий образ,
вселился еси в пустыне, идеже устроив храм
боголепнаго преображения и собрав ученик
множество, богоугодно подвизался еси в посте и
воздержании, терпя различная искушения
благодарно и работая Господеви, Емуже на
небесех предстоя, ныне вопиеш: Аллилуиа.

Икос 10

Стена твердая явился еси всем человеком, к
заступлению твоему прибегающим, преподобне
отче Тихоне, темже и нас, к тебе притекающих и
твоя святая помощи просящих, от всяких бед и

напастей заступай и ограждай, за еже мы
вопием к тебе таковая:

Радуйся, богатства мира сего
возненавидевый;

Радуйся, нетленная сокровища на небесех
возлюбивый.

Радуйся, единого безценного бисера Христа
Бога приобрести;

Радуйся, иноческую нищету возлюбивый.

Радуйся, яко с тою во все дни иноческия
жизни твоя пребыл еси неразлучно;

Радуйся, яко тою стяжал еси богатая
сокровища на небеси.

Радуйся, яко ангельския достигл еси чины,
ихже житию непорочно поревновал еси;

Радуйся, яко уневестил еси душу твою
жениху Христу.

Радуйся, яко от Него на небесех обрел еси
мзду трудов твоих;

Радуйся, яко вшел еси в радость Господа
твоего.

Радуйся, яко тамо наслаждаешься вечныя
славы Его;

Радуйся, преподобне отче наш Тихоне чудотворче.

Кондак 11

Пение благодарственное Христу Богу, ты, преподобне отче Тихоне, прославляющему, вси православнии возсылают, яко Господь даровал есть ти многих чудес силу всякия недуги исцеляти. Ему же ты предстоиши у Престола Его на небесех, нас же земных всех научаеши в Троице Единому Богу воспевати: Аллилуиа.

Икос 11

Светозарным светом блистает преславный храм твой, преподобне отче Тихоне чудотворче, имея цельбоносный твой гроб, яко светильник пресветлый, да входяще видим, и благоговейно чувствуя тя, дерзаем глаголати тебе:

Радуйся, светильниче света небеснаго;

Радуйся, яко лучами святыни твояе нас озаряеши.

Радуйся, яко блистанием чудес твоих нашу страну просвещаеши;

Радуйся, яко притекающих к тебе утешаеши.

Радуйся, врачу душ наших
благоприятнейший;

Радуйся, скорбящих грехами всерадостное
утешение.

Радуйся, отчаянных надежда спасения;

Радуйся, обидимых скорый заступниче.

Радуйся, правды истинный хранителю;

Радуйся, крепкий наш столпе и забрало.

Радуйся, пламень, пожигаяй злочестие;

Радуйся, росоносный облак благодати,
возвращаяй благочестие.

Радуйся, преподобне отче наш Тихоне
чудотворче.

Кондак 12

Благодать, данную тебе от Бога, преподобне
отче Тихоне, сведуще, тебе нашего милостиваго
отца прилежно просим: пролей ныне теплую
твою молитву о нас грешных ко Господу, да
утвердит и укрепит нашу страну российскую,
церковь же святую и веру православную да
сохранит и вся православныя христианы
помилует, всегда вопиющия Ему: Аллилуиа.

Икос 12

Поюще дивнаго во святых Своих Бога нашего, преподобне отче наш Тихоне, и почитающе всечестное твое успение, яко и по преставлении твоём не оставляеши нас благодатными чудес дарованиями, скорое твое нам во всяких нуждах и печалех поможение прославляем, и вопием к тебе сице:

Радуйся, великий наш молитвенниче;

Радуйся, известный Бога умилоствителю.

Радуйся, всех православных скорый помощниче;

Радуйся, в бедах всем скорый заступниче.

Радуйся, сильный в напастех защитниче;

Радуйся, алчущим кормителю.

Радуйся, скорый врачу всем к тебе прибегающим;

Радуйся, всяких исцелений источниче.

Радуйся, люте страждущим помощниче;

Радуйся, везде и всем скорый предстателю.

Радуйся, страны нашея похвало и утверждение;

Радуйся, православному воинству нашему
сила и укрепление.

Радуйся, преподобне отче наш Тихоне
чудотворче.

Кондак 13

О великий и преславный чудотворче и
заступниче наш, Тихоне блаженне! Приими сие
приносимое тебе моление и благоприятным
твоим ходатайством умоли Господа Сил всем
нам избавиться от всяких скорбей, бед и
напастей, и грядущая в небесных благая улучшить
вопиющим Ему: Аллилуиа.

*(Этот кондак читается трижды, затем икос
1 и кондак 1)*

Молитва

О преподобне отче наш Тихоне! Моли
милостиваго Бога о нас, смиренных и
недостойных, раб Божиих (имена), да избавит
храм (дом) сей и приход наш от всяких бед и
зол, да отпустит нам вся прегрешения наша, да
спасет нас благодатию Своею и сподобит
радости вечныя наслаждаться в горнем оном
Иерусалиме купно с тобою и со всеми святыми,
от века Ему благоугодившими, в них же в

Троице славимый Бог благословен есть всегда,
ныне и присно и во веки веков.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
НЕБО